

1836 - Lavina da Giuv

El decuors dil 18 e 19avel tschentaner ein plirs uclauns e beins els aults vegni bandunai per adina. Ils davos habitonts da Giuv, cun la caplutta da s. Bistgaun, bandunan l'ucliva entuorn igl onn 1805. Silsunter ha l'ucliva aunc surviu sco acla e liug da perver cun entgins nuegls. La historia raquenta da neginas lavinas e la caplutta steva leu silla spunda gia dapi miez il 17avel tschentaner. Las spundas sur Giuv fuvan vegnidas niuas, daventadas praus e pastiras. Il prighel semuossa! Igl onn 1836, cun grondas nevadas e cun ina situaziun tut speciala silla spunda dil Culmatsch e Liez, sesvida ina lavina encunter l'ucliva da Giuv, destruescha nuegls e clavaus e satiara plirs perveseders dils quals dus anflan la mort.

Lavina da Giuv, ils 25 da december 1836

Gugliem Gadola, Mustér, en Glogn 1943

Quel che ha legiu la pli biala scartiretta da pader Baseli Berther: „Sas era nua **Giuv** ei?" sa, che per serender a **Giuv**, ston ins ira da **Rueras** a **Dieni**, da leu a **Muschnatscha**, da **Crusch da Giuv** si, epi ein ins el liug. Dapi igl onn 1805 ei **Giuv** in'ucliva depopulada; casas vesan ins buc ina pli, gnanc ils suloms ein pli veseivels! E tuttina ha in e scadin, era sch' el sa buc, il sentiment ch'ei seigi stau cheu in vitg; stat gie l'isolada e carina capluttetta da s. Bistgaun aunc adina amiez ina partida clavaus, sco sch'ella stuess proteger in entir vitg sut sias alas tut alvas. Mo plaun a plaun ein ses protegi e favori sgulai anoragiu e secasai a **Rueras**. Il davos habitont da **Giuv** ei stau Tschimun Decurtins. Plaunsiu ei era la casa vita dil Tschimun, che steva leu aunc enzacons onns suenter 1805 (tenor pader Placi a Spescha) vegnida transportada a **Rueras**, aschia che 1836, igl onn dalla lavina gronda da **Giuv**, negin fiug ardeva pli leu. Encuntercomi temps d'unviern, duront l'envernonza dalla biestga, sesanflavan jamnas ora entirs trops perveseders a **Giuv** naven dalla sera las 4 las 5 entochen la damaun suenter perver.

Aschia stev'ei cun **Giuv** per Nadal 1836, cura che la lavina gronda ei vegnida. E nus astgein bein dir: Per cletg e ventira era **Giuv** depopulau quei onn, schiglioc havess ei dau ina semeglionta catastrofa sco 1749 e 1817 a **Rueras**!

Pader Baseli di en sia bellezza monografia sur **Giuv**: „Dador la baselgia stat sper il mir si ina semplia crusch-lenn, che porta il num da Jesus ed igl onn 1836. Nies cor vegn penetraus da dolor, essend che quella enzena dil salit regorda nus vid la disgrazia, ch'ei succedida cheu la sera dalla fiasta da Nadal entras ina lavina." - Tgei ch'ei schabegiau quella sera, raquenta a nus pli detagliu la cronica dalla claustra da Mustér, scretta da sias uras da pader Augustin Schuoler da **Danis** e che jeu suondel cheu en ses factums principals:

Circa allas quater suentermiezdi ei schabegiau a **Giuv** sut il **Culmatsch** in trest cass che ha contristau ils habitonts da **Rueras**. La lavina ei vegnida giu entochen alla caplutta da s. Bistgaun, ha destruiu siat clavaus cun entirs muvels biestga, dils quals 20 armauls ein vegni smaccai e stenschi. Mo quei ei buc avunda! Tschun stupents mats ein vegni curclai dallas nevadas: Hans Giachen e Gion Antoni Decurtins, dus frars, che han giu la ventira da plaunlur sez puder sefuritgar ord la lavina; item Giusep Maria Monn e siu frar Giachen Antoni, Giusep Luregn Schmed, ensemblamein cun Martin Valier, treis giuvenots, ch'eran en zona e pervesevan las nuorsas, han giu avunda da vegnir satrai vivs. Giusep Maria Monn udend a tschintschond sur el ella neiv, ha griu e saviu vegnir excavaus aunc quei di. Mo meins cletg han ils auters treis giu. Cura che Giusep Maria ei staus liberaus da sia freida fossa, ha el detg siper ses liberaturs: Martin Valier, ch'era en nuegl cun mei sto esser morts, pertgei che jeu hai clamau el, mo negina risposta. Sin quei han ils presents detg: Sch'ei stat aschia, sche mein nus per oz en num da Diu a casa,

pertgei ch'igl ei gia stgira notg. Il Valier denton viveva aunc ed udeva era plaid per plaid tut quei che vegneva plidau sur siu tgau. Udend ils davos plaids, ha el griu e burliu sc'in ch'ei curdaus ord la grazia da Diu; gie, el ha perfin mess dus dets en bucca e schulau quei ch'el ha pudiu, per ch'ei po vegnien en agid. Mo tut adumbatten! Ils buns vischins udend buca stec sut lur peis, ein serendi miez ventschi encunter casa.

O tgei tresta sort! Tgi less pesar, tgi miserar las anguoschas dall'olma e las dolurs dil tgierp, che quei pauper carstgaun ha suffriu quella notg? Il Segner ha denton exaudiu ei. L'auter di, ils 26, han ins excavau vivs il Valier, schebi ch'el era serraus cun las combas denter dus quaders dalla preit-nuegl, che quellas eran tut smardigliadas; cunzun ina! Tgei stermentusas dolurs! Tgei situaziun! Sias combas ein mo pli in frust carn: u ch'el miera, ni ch'el sto schar amputar omisduas combas!

Il medem di han ei excavau morts Giusep Luregn Schmed, ch'era vegnius sturnius d'in quader, sco ins ha saviu constatar. E suenter ei era Gion Antoni Monn, ch'era stenschius e ch'ins ha buca pli saviu clamar en veta.

Pli tard, ils 28 da zercladur 1839, scriva in auter maun la sequenta remarca sigl ur dalla cronica: Oz hai jeu viu el (*Martin Valier*) a **Mustér**, mo en tgei miserabla situaziun! Siu pei dretg ei amputaus entochen schanugl ed il seniester san ei buca curar. Tgei pupratsch! digns da tutta cumpassiun! Martin Valier ei denton mitschus culla veta, ha empriu pli tard da fravi d'iom e cuntschacazzettas; ei maridaus, ha giu diesch affons e vegnius vegls, malgrad sia ruina corporala. (Jeu hai rimnau interessantas notizias sur dad el e vegnel in di cun caschun a far enzatgei ordlunder.)

(Acta capitularia et simul chronica Monasterii Desertinensis ab anno 1821 -1837 inclusive. - T. III. p. 177 f. Copia ella biblioteca romontscha)



Giuv culla caplutta da s. Bistgaun, seniester da via da **Sudada** viers **Planatsch** e **Milez**.